

後

漢

紀

五

Z121.6
1
(5)

後漢紀目錄 并序

晉東陽太守袁宏譔

襄平

蔣國祚

同校

蔣國祚

光武一第一

光武二第二

光武三第三

光武四第四

光武五第五

光武六第六

光武七第七

光武八第八

孝明上第九

孝明下第十

孝章上第十一

孝章下第十二

孝和上第十三

孝和下第十四

孝殤第十五

孝安上第十六

孝安下第十七

孝順上第十八

孝順下第十九

孝質第二十

附 桓帝

孝桓上第二十一

孝桓下第二十二

孝靈上第二十三

孝靈中第二十四

孝靈下第二十五

孝獻一第二十六

孝獻二第二十七

孝獻三第二十八

孝獻四第二十九

孝獻五第三十

予嘗讀後漢書煩穢雜亂睡而不能竟也聊以暇日撰

集爲後漢紀其所綴會漢紀謝承書司馬彪書華嶠書
謝忱書漢山陽公記漢靈獻起居注漢名臣奏旁及諸
郡耆舊先賢傳凡數百卷前史闕略多不次敘錯繆同
異誰使正之經營八年疲而不能定頗有傳者始見張
璠所撰書其言漢末之事瑩詳故復探而益之夫史傳
之興所以通古今而篤名教也巨明之作廣大悉備史
遷剖判六家建立十書非徒記事而已信足扶明義教
網羅治禮然未盡之班固源流周贍近乎通人之作然
因藉史遷無所甄明荀悅才智經綸足爲嘉史所述當
世大得治功已矣然名教之本帝王高義韞而未敘今

因前代遺事畧舉義教所歸庶以弘敷王道前史之闕古者方今不同其流亦異言行趨舍各以類書故觀其名迹想見其人巨明所以斟酌抑揚寄其高懷末吏區區注疏而已其所稱美止於事義疏外之意歿而不傳其遺風餘趣蔑如也今之史書或非古之人心恐千載之外所誣者多所以悵快躊躇操筆悵然者也

後漢孝和皇帝紀下卷第十四

袁宏

九年春三月癸巳濟南王康薨諡曰安王康不修法度通賓客人有上書告康使中郎將張陽董臣招來州郡姦猾顏忠劉子產等案圖書謀議不軌有司舉奏明帝以至親不忍窮竟削祝阿隰陰東胡陽安德西平昌五縣康殖財貨治宮室奴婢至千餘人廩馬千餘匹田八百餘頃何敞之爲傅上疏諫曰蓋聞諸侯之義以制節謹度爲忠然後能保其社稷和其民人昔管仲相齊九合之功而孔子譏其器小以奢侈逼上不知禮也今大王以骨肉之親享蕃國之尊當率先天下以爲化首今

國家制度王侯車服章事有其科不可越也夫文飾者質枯木勝則人亾經傳所載也且君國者以道德仁義爲營豈飾宮室充實廐馬爲尊哉楚作章華吳興姑蘇卒亾景公千駟民無所稱其效也如大王數游諸第出入無節或涉晨夜非所以遠防未然臨深履薄垂示後嗣之法也願大王修恭儉遵古制以法自治以禮率下省奴婢之數減乘馬之費以禮起居則儆之願藥酒苦於口而利於病至言逆耳而便於行惟大王深察愚言王甚敬禮而不能改夏五月封皇后父陰綱爲防侯綱上疏辭位以特進侯就第綱弟鳳謁爲郎中子軼政比

黃門郎陰氏自建武以來緣戚屬之故世爲卿校外典
禁兵內侍帷幄賞賜恩寵貴重當世秋七月蝗蟲飛過
京都閏月辛巳皇太后竇氏崩太尉張酺與司空司徒
共上依呂太后故事貶竇太后尊號勿葬敬陵百官言
之者亦多上手報酺曰禮臣子無貶親之義今皇太后
家雖不遵法度然常欲自減損奉事十年恩不忍虧案
前世上官太后 奉終義從其勿復議丙申葬章德竇
皇后隴西羌犯塞執金吾劉尚將三萬騎擊平之九月
庚申司徒劉方有罪自殺初梁貴人生和帝竇后以爲
己子養而隱之貴人者梁竦女也永平初竦兄陵鄉侯

松因事徙邊後詔書聽還本郡闔門不出作經書數篇
名曰七序班固見而稱之曰昔孔子作春秋而亂臣賊
子懼梁竦作七序而竊位素餐者慙輕財好施不治產
業兄嫂舞陰長公主振施諸梁親疎有序然猶獨敬異
竦衣裘品物事殊別竦未嘗獨饗常與宗族共之竦少
長京師逮父兄時遊士林故不樂歸鄉里雅有大志每
登高望遠未曾不歎息曰大丈夫居世生當封侯死當
廟食詩書足以自娛州郡之職但勞人耳竦生二男三
女長男棠及翟長女嫫及二貴人初馬太后良家女貴
人與姊以選入宮得幸於帝生和帝竦不勝喜與舞陰

長公主私相慶語泄聞於竇氏竇氏欲專名太子外家
心惡梁氏欲毀貶之乃誣以惡逆詔郡縣考竦死獄中
家屬舞陰公主居新野使者護守之貴人與姊以憂死
葬禮有闕竇后崩舞陰公主 子梁扈遣從兄擅奏記
三府曰春秋之義母以子貴漢家舊典也今梁貴人親
育聖躬而不蒙尊號三府 得記謝遣擅太尉張酺獨
見擅具問之曰此公之職而梁氏之福也會以蝗飛過
京師召見對說因具言擅記上曰意云如酺不知葬禮
有闕也對曰陵上宜置長史加祠祭之禮收錄諸舅以
明親親上復曰於義如何酺曰今春秋之義漢家有行

事梁竇並爲名姓保守河西以忠獲封竇憲兄弟不軌
太后謗議籍籍聞於天下姓族死以逾梁氏加以親外
家誠宜尊顯上曰非君孰爲朝廷恩大家事籍籍君所
知上深納訕言會貴人姊嬖上書曰同產女弟貴人前
充後宮蒙先帝厚恩得見寵幸皇天所授誕育陛下爲
竇憲兄弟譖虐妾父竦冤死牢獄骸骨不掩母孤弟遠
徙萬里獨妾遺脫逃伏草野常恐沒命無由自達值陛
下神聖之德統覽萬機憲兄弟皆已伏誅海內曠然各
得其所妾得蘇息拭目更視乃敢昧死自陳妾竊悲死
父旣冤不可復生母年七十遠在絕域不知死生願乞

母弟還本郡收葬竦骨妾聞文帝旣立薄氏蒙榮宣帝
繼統史氏復興矣自悲有薄史之親獨不蒙外戚餘恩
辭甚悲切上惻然感寤使中常侍掖庭令雜訊問嫔辭
語證明甲子改殯梁貴人于承光宮追尊爲皇太后諡
曰恭懷葬于西陵上乃別見嫔嫔具自陳說上歔欷流
涕畱嫔宮中連日不出賞財物第宅旬月之間賞累千
萬嫔素有行遂寵之加號梁貴夫人擢獎嫔夫調爲羽
林佐監追加諡竦爲親愍侯遣中謁者迎竦喪于京師
改殯之賜東園畫棺玉匣冢葬于西陵旁上親臨送徵
竦妻子還京師宋貴人遇竇氏之譖葬禮有闕清河王

慶涕泣不敢言常私祭于室及梁后改葬慶乃上書求
上貴人家詔聽許悲喜曰生雖不得供養終得奉祭祀
私願畢矣太尉張酺上疏乞骸骨上使中黃門問疾加
以珍羞酺稱篤詔曰元首不明黎民困窮朕與君同其
憂責豈可引退邪其勿復言是時酺子蕃以郎侍講上
復詔蕃曰陰陽不調朝廷望公以爲憂託病自退潔已
而已誰當與朕同心者非所望於公也酺惶恐詣闕謝
因起視事酺自爲三公父尙在酺每遷父輒自田里來
適會歲臘公卿罷朝共詣酺父上酒爲酺壽極歡移日
當時以爲榮冬十月癸卯光祿勳呂蓋爲司徒十一月

丙寅司空張奮老病致仕壬申太僕韓稜爲司徒奮在
家上疏曰安上治民莫善於禮移風易俗莫善於樂又
曰揖讓而治天下者禮樂之謂也先王之道於斯爲盛
故曰禮樂不興刑罰不中民無所措手足漢旣受命禮
樂宜作圖讖明文若是以先帝聖德遠監每存禮樂眾
儒不達多生駭異臣累世輔位而漢禮樂未定誠切以
爲憂負臣犬馬齒盡誠冀先死及見禮樂之定上善之
十年夏五月封梁堂爲樂平侯雍爲乘氏侯翟爲單父
侯位特進堂等自九真還過長沙迫從竇瓌令自殺秋
九月庚戌初復廩犧官冬十二月戊辰梁王暢薨諡曰

節王母陰貴人有寵於明帝暢尤愛幸國土租入倍於諸國章帝立緣明帝意賞賜恩寵務加篤厚乃封暢舅陰棠爲西陵侯暢性聰慧然少驕貴頗不遵法度暢常夢見星宿從官卜忌自言善占夢又能使六丁神暢使忌占夢卜筮又使乳母王禮侍史李阿與忌祠祭求福言王當爲天子暢心喜永元初豫州刺史舉奏暢考訊辭不服有司請徵暢詣獄天子以加恩不忍聽復奏徙九真有詔削城武單父二縣暢懼上疏辭謝曰臣天性狂愚少長深宮從官侍史利臣財物暢無所照見與相然諾不自知陷死罪自負自悔無所復及陛下聖德弘

裕枉法赦臣上念以負先帝而令陛下收恥天下誠無
氣以息筋骨不相連臣暢知大貸不可再得束身不敢
復出入乞裁食睢陽穀熟虞蒙寧陵五縣還餘所食四
縣臣暢小妻三十七願還其無子者選擇謹敕奴婢三
百人其餘所受虎賁官騎鼓吹蒼頭兵弩廐馬皆上還
本署陛下加大恩開臣自悔之門假臣小善之路令天
下知臣得去死就生頗能自悔若不聽許臣實無顏以
久生下入黃泉無以見先帝詔曰唯王至親之屬純淑
之美傅相不良不能防邪至令有司紛紛彰于內外今
王深思悔過以自尅責朕惻然傷之傳曰克己復禮天

下歸仁其安心靜意茂休厥德強食自愛其何讓哉暢
固請章數十上卒不許

十一年春三月遣使行郡國水旱災貧不能自存者廩
貸穀食令山林池澤勿收假稅夏四月丙寅大赦天下
十二年春三月賜天下男子爵各有差鰥寡孤獨不能
自存者粟人二斛博士弟子布三匹夏閏四月戊辰南
郡秭歸山崩壓殺百餘人秋七月辛亥朔日有蝕之初
太尉張酺與司隸爰稱會于朝堂酺從容謂稱曰三府
掾史多非其人旣罷稱奏令三府長吏各實其掾史酺
以恨稱會復共謝以責稱稱辭色不順酺怒廷叱之稱